

2023 09 07 PM

PBAPP PERLU SIAPKAN PENGGANTIAN INJAP DALAM TEMPOH 24 JAM - CHOW

09/01/2024



BUTTERWORTH, 9 Dis (Bernama) -- Perbadanan Bekalan Air Pulau Pinang (PBAPP) diingatkan supaya memberi perhatian terhadap tiga perkara utama dalam senarai tugasnya berhubung gangguan bekalan air berjadual yang bermula esok.

Ketua Menteri Chow Kon Yeow berkata PBAPP perlu menyiapkan kerja-kerja penggantian dua unit injap 1,200 milimeter di Loji Rawatan Air (LRA) Sungai Dua dalam tempoh 24 jam seperti dijanjikan sejak sebulan lepas serta 22 projek penyelenggaraan pencegahan lain di seluruh Pulau Pinang.

"Dalam kes ini jika mengikut jadual, bermakna dalam tempoh 24 jam menjelang 6 pagi hari Khamis 11 Jan semua kerja-kerja penggantian dua injap ini perlu disiapkan, tidak kira apa sekalipun yang berlaku.

"Melainkan jika berlaku kemalangan besar, ia perlu dimaklumkan segera tetapi PBAPP tetap perlu berpegang kepada sasaran empat peringkat pemulihan yang mana peringkat pertama 33 peratus daripada pengguna yang terjejas di kebanyakan kawasan di Seberang Perai mendapat bekalan dalam tempoh 48 jam," katanya kepada pemberita selepas melakukan lawatan khas bagi meninjau permulaan penukaran injap di LRA Sungai Dua bersama Ketua Pegawai Eksekutif PBAPP K. Pahtmanathan hari ini..

Beliau berkata 84 peratus pengguna di Pulau Pinang dan Seberang Perai dijangka menerima air dalam tempoh 72 jam dan 99.5 peratus dalam tempoh 96 jam iaitu pada 14 Jan manakala peringkat keempat membabitkan baki 0.5 peratus lagi pengguna di kawasan kejiranan hujung paip agihan (EoL) dan tanah tinggi.

Chow berkata PBAPP juga perlu menyiarkan sekurang-kurangnya tiga kemas kini setiap hari mengenai kemajuan kerja dan proses pemulihan bekalan selain mengeluarkan kenyataan media mengikut keperluan.

Pathmanathan pula berkata pihaknya telah mengambil kira pelbagai faktor termasuk cuaca dan memberi jaminan bahawa kerja-kerja penggantian paip itu akan tetap dijalankan serta siap seperti dijadualkan.

"Kita telah mengambil langkah dengan mendirikan khemah dan jika hujan sekalipun, ia tidak akan mengganggu gerak kerja yang dilakukan.

"Beberapa unit pam turut disediakan untuk mengeluarkan air sekiranya terdapat takungan di kawasan penugasan. Saya beri jaminan bahawa kami akan pastikan penggantian injap ini siap dalam tempoh 24 jam," katanya.

Sebelum ini, PBAPP mengumumkan kira-kira 590,000 pengguna termasuk bukan domestik akan mengalami gangguan air berjadual selama 96 jam dari 6 pagi pada 10 Jan hingga 6 pagi 14 Jan bagi membolehkan penggantian dua unit injap di LRA Sungai Dua dan kerja sampingan lain di 22 lokasi di seluruh Pulau Pinang dilakukan.

Bagaimanapun, PBAPP menjangkakan sekurang-kurangnya 101 kawasan di daerah Seberang Perai Utara dan Seberang Perai Tengah (SPT) akan menerima bekalan air selepas 48 jam manakala 157 lokasi membabitkan daerah SPT, Seberang Perai Selatan dan Timur Laut serta Barat Daya di kawasan pulau akan mula menerima bekalan selepas 72 jam.